

Erindisbréf menningar- og ferðamálaráðs Bolungarvíkurkaupstaðar

1.gr.

Menningar- og ferðamálaráð, sem starfar samkvæmt V. kafla sveitarstjórnarlaga nr. 138/2011 telst til fastanefnda Bolungarvíkurkaupstaðar. Menningar- og ferðamálaráð fer með verkefni bókasafna skv. bókasafnslögum nr. 150/2012, menningarminjar skv. lögum um menningarminjar nr. 80/2012, Félagsheimili skv. lögum um félagsheimili nr. 107/1970 og söfn skv. safnalögum nr. 141/2011. Menningar- og ferðamálaráð skal starfa í samræmi við þau lög sem um það gilda, samþykktir Bolungarvíkurkaupstaðar og erindisbréf þetta.

2.gr.

Erindisbréf þetta byggir að auki á ákvæðum stjórnarsýslulaga nr. 37/1993 og eftir atvikum ákvæðum annara laga og reglugerða sem ná til málaflokka menningar- og ferðamála. Menningar og ferðamálaráð skal við undirbúning mála og stjórnvaldsákvæðana gæta þess að farið sé að stjórnarsýslulögum og reglum um vandaða stjórnarsýslu.

Ef það er misræmi milli efnis erindisbréfs, annars vegar, og laga, reglna og samþykktar Bolungarvíkurkaupstaðar, hins vegar, skulu hinar síðarnefndu reglur gilda.

3.gr.

Menningar- og ferðamálaráð Bolungarvíkurkaupstaðar er kosið af bæjarstjórn Bolungarvíkurkaupstaðar. Menningar- og ferðamálaráð er skipað þremur fulltrúum og jafn mörgum til vara í samræmi við B2 lið 46. gr. samþykktar um stjórn Bolungarvíkurkaupstaðar. Bæjarstjórn kys formann Menningar- og ferðamálaráðs.

4. gr.

Formaður menningar- og ferðamálaráðs undirbýr og boðar fundi ráðsins. Bæjarstjóri ber ábyrgð á að samþykktum og ákvörðunum ráðsins sé hrint í framkvæmd.

5.gr

Bæjarstjóri eða starfsmenn í hans umboði geta ávallt óskað eftir því að menningar- og ferðamálaráð taki ákvörðun í máli. Bæjarstjóri skal á um 3 mánaða fresti upplýsa ráðið um þau mál sem hann afgreiðir í umboði ráðsins.

6. gr.

Menningar- og ferðamálaráð hefur yfirumsjón með safnamálum, félagsheimili, bókasafni, viðburðum Bolungarvíkurkaupstaðar og styrkveitingum innan sveitarfélagsins. Menningar- og

ferðamálaráð vinnur að markmiðum sínum með stefnumótandi samþykktum og ákvörðunum sem taka mið af samþykkttri stefnu ráðsins og/eða bæjarstjórnar í málefnum varðandi menningar- og ferðamál.

Bæjarráð úthlutar fjárhagsramma til ráðsins vegna fjárhagsáætlunar fyrir hvert starfsár.

7. gr.

Menningar- og ferðamálaráð gerir tillögur til bæjarstjórnar um stefnumörkun á sviði menningar- og ferðamála hjá Bolungarvíkurkaupstað. Ráðið vinnur að því að deildir og stofnanir á þess vegum vinni að settum markmiðum, starfsmenn veiti góða þjónustu og að starfsemin sé skilvirk og hagkvæm.

8. gr.

Hlutverk ráðsins er:

- að koma að skipulagningu viðburða á vegum sveitarfélagsins. Ráðið hefur tillögurétt við skipulagninguna en framkvæmd viðburða er á vegum starfsmanna sveitarfélagsins.
- að starfa með forstöðumönnum að menningar- og ferðamálum.
- að gera tillögu til bæjarstjórnar um úthlutun styrkja til menningarmála innan ramma fjárhagsáætlunar sveitarfélagsins.
- að vinna að eflingu menningartengdrar ferðaþjónustu í sveitarfélaginu í samstarfi við hlutaðeigandi aðila.
- að gera tillögu til bæjarráðs um menningarstefnu sveitarfélagsins sem og að leggja drög að stefnu og markmiðum í ferða- og safnamálum.
- að gera tillögu til bæjarráðs um staðsetningu hvers konar listaverka í opinberu rými í samráði við umhverfismálaráð.
- að fara með þau verkefni sem bókasafnsnefnd eru falin samkvæmt lögum um almenningsbókasöfn.
- að leggja mat á þá þjónustu sem veitt er á vegum sveitarfélagsins í ferða-, safna- og menningarmálum með tölulegum upplýsingum. Einnig að fjalla um þær ábendingar sem berast vegna þjónustunnar.
- að vera bæjarstjórn til ráðuneytis um framkvæmdir og byggingu mannvirkja í þágu ferða-, safna- og menningarmála.
- að stuðla að góðu samstarfi félagasamtaka á sviði ferða-, safna- og menningarmála í sveitarfélaginu.
- að vera bæjarstjórn til ráðgjafar um ferðamál í sveitarfélaginu sem og að afla hugmynda að nýjum tækifærum í ferðamálum.
- að fylgjast með og halda saman gögnum um fjölda ferðamanna í sveitarfélaginu.

9.gr.

Fulltrúa er skylt að sækja alla fundi nema um lögmæt forföll sé að ræða, svo sem önnur brýn skyldustörf eða veikindi. Geti fulltrúi ekki sótt fund skal hann boða varamann í sinn stað.

Fundir skulu haldnir að minnsta kosti einu sinni í mánuði eða oftar ef þurfa þykir. Formaður ráðsins hefur vald til að taka ákvörðun um að fella niður fund ef hún byggir á málefnalegum ástæðum. Til fundar telst löglega boðað hafi allir atkvæðisbærir fulltrúar eða/og varamenn í forföllum aðalmanna svo aðrir sem seturétt eiga á fundinum, verið boðaðir með að minnsta kosti tveggja sólarhringa fyrirvara með skriflegri dagskrá.

Komi upp mál sem krefst skjótrar úrlausnar ráðsins getur fyrirvari um boðun verið skemmri. Heimilt er að taka mál til meðferðar í ráðinu þótt það sé ekki tilgreint í dagskrá en það skal tilkynna í upphafi fundar. Þó er skylt að fresta afgreiðslu slíks máls ef einhver ráðsmanna óskar þess.

Fundur er lögmætur ef löglega er til hans boðað og meira en helmingur atkvæðisbærra fulltrúa er mættur á fundinn. Ráðið getur enga bindandi ályktun gert nema fundur sé lögmætur.

10. gr.

Um fundarsköp og málsmeðferð í menningar- og ferðamálaráði fer eftir sem við á samkvæmt III. kafla samþykktar um stjórn Bolungarvíkur.

Formaður ráðsins stýrir fundum þess. Fundir ráðsins skulu jafnan haldnir fyrir luktum dyrum. Ráðið getur boðið á sinn fund einstaka starfsmenn bæjarins sem og aðra til viðræðna um einstaka mál.

Fulltrúar skulu gæta trúnaðar um það sem þeir verða áskynja í starfi ráðsins og leynt á að fara samkvæmt lögum eða eðli máls. Þagnarskylda helst þó látið sé af þessum störfum. Ákvæði þetta á einnig við um aðra fundarmenn.

Menningar- og ferðamálaráð skal á fundum sínum taka fyrir þau erindi sem berast, fjalla um þau og gera tillögur um afgreiðslu þeirra til bæjarstjórnar. Á fundum er mál afgreitt með því að samþykkja það eða fella, vísa því frá eða vísa því til afgreiðslu bæjarráðs, bæjarstjórnar eða til bæjarstjóra.

Menningar- og ferðamálaráði er heimilt að fresta afgreiðslu máls nema um sé að ræða mál sem að lögum ber að afgreiða fyrir tiltekinn tíma. Ráðið getur vísað málum til umsagnar annara nefnda, ráða eða annara aðila.

Fulltrúi á rétt á að fá bókaða stutta athugasemd um afstöðu sína til máls, sem til meðferðar er í ráðinu. Menningar- og ferðamálaráð kemur ákvörðunum sínum og stefnumótun í framkvæmd með formlegum samþykktum á lögmætum fundum. Formaður eða aðrir fulltrúar menningar- og ferðamálaráðs skulu snúa sér til tæknideildar eða bæjarstjóra með eftirfylgni staðfesta samþykktu ráðsins.

11. gr.

Ráðið skal halda fundargerðabók og ritari skal færa fundargerð í fundargerðabók. Um ritun fundargerðar gilda sömu reglur og um ritun fundargerða bæjarstjórnar, sbr. 16. gr. samþykktar um stjórn Bolungarvíkur.

Fundargerðir menningar- og ferðamálaráðs þarfnast staðfestingar bæjarstjórnar Bolungarvíkur til að teljast gildar. Fundargerðir ráðsins skulu teknar á dagskrá bæjarstjórnar og skal það gert svo fljótt sem unnt er að afloknum fundi. Ef fundargerðir innihalda ekki ályktanir eða tillögur sem þarfnast sérstakrar staðfestingar bæjarstjórnar eru fundargerðir lagðar fram til kynningar.

12.gr.

Menningar- og ferðamálaráð skal í allri sinni ákvarðanatöku hafa hagsmuni allra íbúa að leiðarljósi. Það leggur þær skyldur á fulltrúa í ráðinu að setja ávallt almannahagsmuni ofar sérhagsmunum, hvort heldur sínum eigin eða einstakra hópa er þeir tengjast eða tilheyra.

Fulltrúi hefur ekki atkvæðisrétt um mál sem varða hann sjálfan eða náð skyldmenni hans og skal hann í slíkum tilvikum víkja af fundi. Um hæfi fulltrúa og starfsmanna menningar- og ferðamálaráðs er vísað til 20. gr. sveitarstjórnarlaga nr. 138/2011, sbr. II. kafla stjórnsýslulaga nr. 37/1993 og 17. gr. samþykktar um stjórn Bolungarvíkurkaupstaðar.

13.gr.

Menningar- og ferðamálaráð hlutast ekki um daglegan rekstur og starfsemi þeirra stofnana sem heyra undir ábyrgðar- og eftirlitssvið ráðsins. Menningar- ferðamálaráð hefur umsjón með framkvæmdastjórn þeirra stofnana sem undir ráðið heyra.

Ráðið hefur ekki boðvald yfir starfsfólki stofnana. Ráðið skal fjalla um umsóknir og gefur rökstudda umsögn til bæjarstjórnar vegna ráðningar forstöðumanna. Ákvörðun ráðningar annara starfsmanna er á ábyrgð og í valdi viðkomandi forstöðumanns.

14.gr

Erindisbréf þetta hefur verið samþykkt í bæjarstjórn Bolungarvíkur og tekur gildi þann

11. mars 2025.